

Skatterådimit najoqqutassiaq

**Pineqartog: Kalaallit Nunaanni Namminersornerullutik Oqartussat kommunellu piniarnermik nakkutilliisutut atorfeqartitaanut ilanngaasat.**

Piniarnermik nakkutilliisut, Kalaallit Nunnaanni Namminersornerullutik Oqartussat kommunellu piniarnermik nakkutilliisutut atorfeqartitaasa aningaasarsiaat atorfeqarnerminnilu atugasaaat pillugit regulatiivi naapertorlugu atorfinitsitaasimasut, regulatiivimi § 6 naapertorlugu nakkutilliillutik sulinerminnut atatillugu nammineq angallamminnik, qimussiminnik imaluunniit snescooteriminnik atugaqartartut tapisiaqartinneqatartussaapput.

Tapisiat ima aningaasartaqarput:

Angallammut, ulloq unnuarlu 500 koruunit

Qimussimut, ulloq unnuarlu 250 koruunit

Snescooterimut, ulloq unnuarlu 250 koruunit

Tapisiat taakku matusissutissaapput angallatip, qimussip imaluunniit snescooterip atorneranni aningaasartuutitut tamanut, matumani ilanngullugit ingerlatsinermi atortunut, nerukkaatisanut, aserfallatsaaliuinermut, nungullarnernut sillimmasiinernullu il.il.

Najoqqutassiaq ataani allassimasoq piniarnermik nakkutilliisut nakkutilliinerminni nammineq angallamminnik, qimussiminnik snescooteriminnilluunniit atuinerannut atatillugu ilanngaateqarsinnaanerit Skatterådip atortussanngortippaa regulatiivip ullormi 1. december 1994 - imi atuutilerfianniit.

Piniarnermik nakkutilliisut tapisiat pissarsiarinerannut atasumik ingerlatsinermi aningaasartuutit uppersaateqartit ilanngaatigisinnaavaat, tak. aningaasarsianit akileraarutit pillugit Inatsisartut inatsisaanni § 17. Ingerlatsinermi aningaasartuutit tassaaassapput angallatip, qimussip snescooterilluunniit angallatiginerannut atasumik aningaasartuutit, kiisalu aningaasartuutit allat, soorlu aserfallatsaaliuinermut sillimmasiinernullu atorsimasat ilaat atuisimanermit naleqqussarneqarsimasut. Tamatuma saniatigut akileraartarnermi nalikilliliisoqarsinnaavoq angallatip, qimussip snescooterilluunniit inuussutissarsiornermut atorneqarnerat, matumani nakkutilliinermi atorneqarnerat ilanngullugu, atuinerup tamarmiusup minnerpaamik affaripagu, tak. akileraartarnermi nalikilliliinerit il.il. pillugit Namminersornerullutik Oqartussat nalunaarutaanni nr. 18-imi 9. juni 1986 - imeersumi § 5. Taamaassimappat nalikilliliisutit ilanngaatigineqarsinnaapput angallammik, qimussimik snescooterimilluunniit inuutissarsiornermut aammalu tamakkiisumik atuinerup annertussutsimikkut nikinganerit najoqqutaralugu.

Aningaasartuuterpiaat atornagit piniarnermik nakkutilliisut aalajangersinnaapput aningaasat nammineq angallammik, qimussimik snescooterimilluunniit atuinerminnut tapisiaminnut naapertuuttut, uppersaasarnagit, ilanngaatigiumallugit. Ilangaatit taakkua annertussusiisa taamaaqatigissavaat aningaasartuutit tamarmiusut, tapisiat - taakkununga ilanngullugit akileraartarnermi nalikilliliinerit - pissarsiarinerannut atasumik atorneqarsimasut.

Periaaseq taanna namminerisamik angallatip, qimussip snescooterilluunniit atornerannut ilanngaatissap angissusilernissaanut atorumaneqarsimappat inuussutissarsiummut allamut atasumik aningaasartuutit, tapisiat matusassaannut ilaasut, ilanngaatigineqarsinnaanngillat. Taamaalilluni aamma akileraartarnermi nalikilliliisoqarsinnaanngilaq nakutilliilluni sulinermi angallammik, qimussimik snescooterimilluunniit atuinermit attuumassuteqartunut.

Piniarnermik nakkutilliisoq aalajangersimappat aningaasat tapisianut tunniunneqartunut naapertuuttut ilanngaatigiumallugit, taava taamaalilluni nakkutilliilluni sulinermi nammineq angallammik, qimussimik snescooterimilluunniit atuineq akileraartarnermi nalikilliliinerit il.il. pillugit Namminersornerullutik Oqartussat nalunaarutaanni nr. 18-imi 9. juni 1986-i-meersumi immikkoortoq II naapertorlugu inuussutissarsiornermut atorneqartutut isigineqarsinnaangilaq.

Aammattaaq angallat, qimusseq snescooteriluunniit nalikillilerneqarsimanngippata taakkua tunineranni iluanaarutit ajunaarutilluunniit aningaasarsiat akileraaruteqaataasussani ilanngunneqartussaannngillat.

Oqaatigineqassaaq tapisiat tassaammata aningaasarsiat A-t, taamaattumik siumoortumik nalunaarsuinermi ilanngaateqartitsinissaq eqqaamasariaqarpoq.